

摘藻堂四庫全書薈要

史部

欽定四庫全書薈要

史部  
金史卷  
七十九至  
八十一

詳校官編修臣程嘉謨



欽定四庫全書蒼苔要卷六千三百二十一

金史卷七十九

元中書右丞相總裁托克托等修

傳第十七

鄺瓊

李成

孔彥舟

徐文

施宜生

張中孚

張中彥

宇文虛中

王倫

鄺瓊字國寶相州臨漳人補州學生宋宣和間盜賊起

瓊乃更學擊刺挽強試弓馬隸宗澤軍駐于磁州未幾告歸括集義軍七百人復從澤澤署瓊為七百人長澤死調戍滑州時宗望伐宋將渡河戍軍亂殺其統制趙世彥而推瓊為主瓊因誘衆號為勤王行且收兵北渡淮有衆萬餘康王以為楚州安撫使淮南東路兵馬鈐轄累遷武泰軍承宣使未幾率所領步騎十餘萬附于齊授靜難軍節度使知拱州齊國廢以為博州防禦使用廉遷驃騎上將軍宗弼復河南以瓊為山東路弩手

千戶知亳州事丁母憂去官宗弼再伐江南以瓊素知南方山川險易召至軍與計事從容語同列曰瓊嘗從大軍南伐每見元帥國王親臨陣督戰矢石交集而王免胄指麾三軍意氣自若用兵制勝皆與孫吳合可謂命世雄材矣至於親冒鋒鏑進不避難將士視之孰敢愛死乎宜其所向無前日闢國千里也江南諸帥才能不及中人每當出兵必身居數百里外謂之持重或督召軍旅易置將校僅以一介之士持虛文諭之謂之調

發制敵決勝委之偏裨是以智者解體愚者喪師幸一  
小捷則露布飛馳增加俘級以為己功斂怨將士縱或  
親臨亦必先遁而又國政不綱纔有微功已加厚賞或  
有大罪乃置而不誅不即覆亡已為天幸何能振起耶  
衆以為確論元帥謂宗弼也及宗弼問瓊以江南成敗  
誰敢相拒者瓊曰江南軍勢怯弱皆敗亡之餘又無良  
帥何以禦我頗聞秦檜當國用事檜老儒所謂亡國之  
大夫兢兢自守惟顛覆是懼吾以大軍臨之彼之君臣

方且心破膽裂將哀鳴不暇益傷弓之鳥可以虛弦下也既而江南果稱臣宗弼喜瓊為知言初瓊去堯未幾宋兵陷之而不守復棄去乃以州人宋超守之及大軍至超復以州事委其鈐轄衛經而遁去帥府使人招經經不下及城潰百姓惶懼待命瓊請於元帥曰城所以不下凶豎劫之也民何罪願慰安之元帥以瓊先嘗守堯因止戮經而釋其州人復命瓊守堯凡六年堯人德之遷武寧軍節度使八年為泰寧軍節度使九年遷歸

德尹貞元元年加金紫光祿大夫卒于官年五十

李成字伯友雄州歸信人勇力絕倫能挽弓三百斤宋

宣和初試弓手挽強異等累官淮南招捉使成乃聚衆

為盜鈔掠江南宋遣兵破之成遂歸齊累除知開德府

從大軍伐宋齊廢再除武安軍節度使成在降附諸將

中最勇鷙號令甚嚴衆莫敢犯臨陣身先諸將士卒未

食不先食有病者親視之不持雨具雖沾濕自如也有

告成反者宗弼察其誣使成自治成杖而釋之其不校



如此以此士樂為用所至克捷宗弼再取河南宋李興  
據河南府成引軍入孟津興率衆薄城鼓譟請戰成不  
應日下是興士卒倦且飢成閉門急擊大破之興走漢  
南成遂取洛陽嵩汝等河南平宗弼奏成為河南尹都  
管押本路兵馬嘗取官羨粟充公費坐奪兩官解職正  
隆間起為真定尹封郡王例封濟國公卒年六十九  
孔彥舟字巨濟相州林慮人亡賴不事生產避罪之汴  
占籍軍中坐事繫獄說守者解其縛乘夜踰城遁去已

而殺人亡命為盜宋靖康初應募累官京東西路兵馬  
鈐轄聞大將軍至山東遂率所部劫殺居民燒廬舍掠  
財物渡河南去宋人復招之以為沿江招捉使彥舟暴  
橫不奉約束宋人將以兵執之彥舟走之齊從劉麟伐  
宋為行軍都統改行營左總管齊國廢累知淄州從宗  
弼取河南克鄭州擒其守劉政破孟邦傑於登封授鄭  
州防禦使討平太行車轅嶺賊從征江南渡淮破孫暉  
兵萬餘人下安豐霍邱及攻濠州以彥舟為先鋒順流

薄城擒其水軍統制邵青遂克濠州師還累官工兵部尚書河南尹封廣平郡王正隆例降金紫光祿大夫改南京留守彥舟荒于色有禽獸行妾生女姿麗彥舟苦虐其母使自陳非己女遂納為妾其官屬負官錢私其妻與折券惟破濠州時諸軍凡係獲皆殺之彥舟號令毋輒殺免者數千人頗以此稱之然自幼至老常在行伍習兵事知利鈍海陵欲以為征南將佐正隆五年除南京留守彥舟有疾朝臣有傳彥舟死者而彥舟尚

無恙海陵盡杖妄傳彥舟死者以激勵之無何竟死於汴年五十五遺表言伐宋當先取淮南云

徐文字彥武萊州掖縣人徙膠水少時販鹽為業往來瀕海數州剛勇尚氣儕輩皆憚之宋季盜起募戰士為密州板橋左十將勇力過人揮巨刀重五十斤所向無前人呼為徐大刀後隸王龍圖麾下與夏人戰生擒一將補進武校尉東還破羣賊楊進等轉承信郎宋康王渡江召文為樞密院准備將擒苗傅及韓世績以功遷

淮東浙西沿海水軍都統制諸將忌其材勇是時李成  
孔彥舟皆歸齊宋人亦疑文有北歸志大將閻臯與文  
有隙因而譖之宋使統制朱師敏來襲文文乃率戰艦  
數十艘泛海歸于齊齊以文為海密二州滄海都招捉  
使兼水軍統制遷海道副都統兼海道總管賜金帶文  
以策干劉豫欲自海道襲臨安豫不能用齊國廢元帥  
府承制以文為南京步軍都虞候權馬步軍都指揮使  
天眷元年破太行賊梁小哥以本職兼水軍統制朝廷

以河南與宋除文山東路兵馬鈐轄宗弼復取河南文  
破宋將李寶於濮陽孟邦傑於登封宋將知軍據河陽  
文遲明至其城下使別將攻城東北自將精銳潛師襲  
南門城中悉衆救東北文乃自南門斬關入城宋軍潰  
去追擊敗之破郭清郭遠於汝州鄭州叛復取之擊走  
宋將戚方河南既平宗弼勞賞將士賞文銀幣鞍馬充  
行軍萬戶從宗弼取廬濠等州超換武義將軍知濟州  
在職七年移知泰安軍海陵即位錄舊功累遷中都兵

馬都指揮使賜金帶改濬州防禦使未幾海陵謀伐宋  
改行都水監監造戰船於通州東海縣人徐元張旺作  
亂縣人房真等三人走海州及走總管府上變州府皆  
遣使効隨真等詣東海觀賊形勢皆為賊所害州府合  
兵敗之累月不下海陵且欲伐宋惡聞其事詔文與步  
軍指揮使張弘信同知大興尹李惟忠宿直將軍蕭阿  
古率舟師九百浮海討之謂文等曰朕意不在一邑將  
以試舟師耳文等至東海與賊戰敗之斬首五千餘級

獲徐元張旺餘衆請降是役也張弘信行至萊州稱疾  
留止日與妓樂飲酒海陵聞之師還杖弘信二百文遷  
定海軍節度使房真三人官賞有差死賊者皆贈官三  
級以銀百兩絹百疋賜其家大定二年詣闕自陳年老  
目昏懇求致仕許之以覃恩遷龍虎衛上將軍卒于家  
施宜生字明望邵武人也博聞強記未冠由鄉貢入太  
學宋政和四年擢上舍第試學官授潁州教授及王師  
入汴宜生走江南復以罪北走齊上書陳取宋之策齊



以為大總管府議事官失意於劉麟左遷彰信軍節度判官齊國廢擢為太常博士遷殿中侍御史轉尚書吏部員外郎為本部郎中尋改禮部出為隰州刺史天德二年用參知政事張浩薦宜生可備顧問海陵召為翰林直學士撰太師梁王宗弼墓銘進官兩階正隆元年出知深州召為尚書禮部侍郎遷翰林侍講學士四年冬為宋國正旦使宜生自以得罪北走恥見宋人力辭不許宋命張燾館之都亭因問以首邱風之宜生顧其

介不在旁為廋語曰今日北風甚勁又取几間筆扣之

曰筆來筆來於是宋始警其副使耶律必埒哩使還以  
聞坐是烹死初宜生困於塲屋遇僧善風鑿謂之曰子  
面有權骨可公可卿而視子身之毛皆逆上且覆腕必  
有以合乎此而後可貴也宜生聞其言大喜竟從范汝  
為於建劔已而汝為敗變服為傭泰之吳翁家三年翁  
異之一日屏人詰其姓名宜生曰我服傭事惟謹主人  
乃亦寘疑邪因固詰之則請其故翁曰日者燕客執事

咸餒而汝獨孫諸儕且撤器有歎聲是以識汝非真傭也宜生遂告之故翁贖之金夜濟淮以歸試一日獲熊三十六賦擢第一其後竟如僧言

張中孚字信甫其先自安定徙居張義堡父達仕宋至太師封慶國公中孚以父任補承節郎宗翰圍太原其父戰歿中孚泣涕請迹父屍乃獨率部曲十餘人入大軍中竟得其屍以還累官知鎮戎軍兼安撫使屢從吳玠張浚以兵拒大軍浚走巴蜀中孚權帥事天會八年

睿宗以左副元帥次涇州中孚率其將吏來降睿宗以  
為鎮洮軍節度使知渭州兼涇原路經畧安撫使齊國  
建以什一法括民田籍丁壯為鄉軍中孚以為涇原地  
瘠無良田且保甲之法行之已習今遽紛更人必逃徙  
抵見其害未見其利也竟執不行時齊政甚急莫敢違  
人為中孚懼而中孚不之顧未幾齊國廢一路獨免括  
克之患天眷初為陝西諸路節制使知京兆府朝廷賜  
地江南中孚遂入宋宗弼再定河南陝西移文宋人使

歸中孚至汴就除行臺兵部尚書遷除參知行臺尚書  
省事明年拜參知政事貞元元年遷尚書左丞封南陽  
郡王三年以疾告老乃為濟南尹加開府儀同三司封  
宿王移南京留守又進封崇王卒年五十九加贈鄧王  
中孚天性孝友剛毅與弟中彥居未嘗有間言喜讀書  
頗能書翰其御士卒嚴而有恩西人尤畏愛之葬之日  
老穉扶柩流涕蓋數萬人至為罷市其得西人之望如  
此正隆例封崇進原國公

張中彥字才甫中孚弟少以父任仕宋為涇原副將知德順軍事睿宗經畧陝西中彥降除招撫使從下熙河階成州授彰武軍承宣使為本路兵馬鈐轄遷都總管宋將闕師古圍鞏州與秦鳳李彥琦會兵攻之王師下饒風關得金洋諸州以中彥領興元尹撫輯新附師還代彥琦為秦鳳經畧使秦州當要衝而城不可守中彥徙治北山因險為壘今秦州是也築臘家諸城以扼蜀道帥秦凡十年改涇原路經畧使知平涼府朝廷以河

南陝西賜宋中孚以官守隨例當留關中熙河經畧使

慕洎謀入夏將闚關陝中彥與環慶趙彬會兩路兵討

之洎敗入于夏中彥與兄中孚俱至臨安被留以為龍

神衛四部都指揮使清遠軍承宣使提舉祐神觀靖海

軍節度使皇統初恢復河南詔中彥兄弟北歸以為靜

難軍節度使歷彰化軍鳳翔尹改尹慶陽兼慶原路兵

馬都總管寧州刺史宗室宗淵毆死僚佐梁郁郁遠人

家貧無能赴告者中彥力為正其罪竟寘于法改彰德

軍節度使均賦調法姦豪無所蔽匿人服其明正隆營  
汴京新宮中彥採運關中材木青峰山巨木最多而高  
深阻絕唐宋以來不能致中彥使搆崖駕壑起長橋十  
數里以車運木若行平地開六盤山水洛之路遂通汴  
梁明年作河上浮梁復領其役舟之始製匠者未得其  
法中彥手製小舟才數寸許不假膠漆而首尾自相鉤  
帶謂之鼓子卯諸匠無不駭服其智巧如此浮梁巨艦  
畢功將發旁郡民曳之就水中彥召役夫數十人治地



勢順下傾瀉于河取新秫稽密布於地復以大木限其  
旁凌晨督衆乘霜滑曳之殊不勞力而致諸水俄遷平  
陽海陵將伐宋驛台赴闕授西蜀道行營副都統制賜  
細鎧使先取散關俟後命世宗即位赦書至鳳翔諸將  
惶惑不能決去就中彥曉譬之諸將感悟受詔上召中  
彥入朝以軍付統軍喀齊喀及見賜以所御通犀帶封  
宗國公尋為吏部尚書上疏曰古者闕市譏而不征今  
使掌闕市者征而不譏苛留行旅至披剔囊笥甚於剽

掠有傷國體乞禁止從之踰年除南京留守時淮楚用  
兵土民與戍兵雜居訟牒紛緒所司皆依違不決中彥  
得戍兵為盜者悉論如法帥府怒其專決劾奏之朝廷  
置而不問秩滿轉真定尹兼河北西路兵馬都總管未  
幾致仕西歸京兆明年起為臨洮尹兼熙秦路兵馬都  
總管華州劉海構亂既敗籍民之從亂者數千人中彥惟  
論為首者戮之西羌吹濟雅密藏隆普彭布四族恃險  
不服使侍御史沙醇之就中彥論方畧中彥曰此羌服

叛不常若非中彥自行勢必不可即至積石達南寺首  
長四人來與之約降事遂定賞而遣之還奏上大悅遣  
張汝王馳驛勞之賜以毬文金帶用郊恩加儀同三司  
以疾卒官年七十五百姓哀號輟市立像祀之

贊曰自古健將武夫其不才者遭世變遷賣降恐後此  
其常態君子之所不責也酈瓊徐文是已施宜生反覆  
壬人李成盜賊之靡孔彥舟漁色親出自絕人類又何  
責也張中孚中彥雖有小惠足稱然以宋大臣之子父

戰沒於金若金若齊義皆不共戴天之讐金以地與齊則甘心臣齊以地歸宋則忍恥臣宋金取其地則又比肩臣金若趨市然惟利所在於斯時也豈復知所謂綱常也哉吁

宇文虛中字叔通蜀人初仕宋累官資政殿大學士天會四年宋少帝已結盟宗望班師至孟陽宋姚平仲乘夜來襲明日復進兵圍汴少帝使虛中詣宗望軍告以襲兵皆將帥自為之復請和議如初且視康王安否頃

之臺諫以和議歸罪虛中罷為青州復下遷祠職建炎  
元年貶韶州二年康王求可為奉使者虛中自貶中應  
詔復資政殿大學士為祈請使是時興兵伐宋已留王  
倫朱并不遣虛中亦被留實天會六年也時朝廷方議禮  
制度頗愛虛中有才藝加以官爵虛中即受之與韓昉  
輩俱掌詞命明年洪皓至上京見虛中甚鄙之天會十  
三年熙宗即位宗翰為太保領三省事封晉國王乞致  
仕批答不允其詞虛中作也天眷間累官翰林學士知

制誥兼太常卿封河內郡開國公書太祖睿德神功碑  
進階金紫光祿大夫皇統二年宋人請和其誓表曰自  
來流移在南之人經官陳說願自歸者更不禁止上國  
之於敝邑亦乞並用此約於是詔尚書省移文宋國理  
索張中孚張中彥鄭億年杜充張孝純宇文虛中王進  
家屬發遣李正民畢良史還宋惟孟庚去留聽其所欲  
時虛中子師瑗仕宋至轉運判官攜家北來四年轉承  
旨加特進遷禮部尚書承旨如故虛中恃才輕肆好譏

訛凡見女直人輒以曠野目之貴人達官往往積不能  
平虛中嘗撰宮殿榜署本皆嘉美之名惡虛中者摘其  
字以為謗訛朝廷由是媒孽以成其罪矣六年二月唐  
古綽哈家奴杜塔富拉告虛中謀反詔有司鞠治無狀  
乃羅織虛中家圖書為反具虛中曰死自吾分至於圖  
籍南來士大夫家家有之高士談圖書尤多於我家豈  
亦反耶有司承順風旨并殺士談至今寃之士談字季  
默高瓊之後宣和末為忻州戶曹參軍入朝官至翰林

直學士虛中士談俱有文集行于世

王倫字正道故宋宰相王旦弟王勉玄孫俠邪無賴年四十餘尚與市井惡少羣遊汴中天會五年宋人以倫為假刑部侍郎與閤門舍人朱弁充通問使是時方議伐宋凡宋使者如倫及宇文虛中魏行可顧縱張邵等皆留之不遣居數年倫久困乃倡為和議求歸元帥府使人謂之曰此非江南情實特汝自為此言耳倫曰使事有指不然何為來哉惟元帥察之天會十年劉豫連



歲出師皆無功達蘭為元帥左監軍經畧南邊密主和議乃遣倫歸先此宋已遣使乞和朝廷未之許也倫見康王言和議事康王大喜遷倫官并官其子弟宋方與齊用兵未可和天會十五年康王聞天水郡王已薨以倫假直學士來請其喪使倫請達蘭曰河南之地上國既不自有與其封劉豫曷若歸之趙氏是歲劉豫受封已八年不能自立其國尚勤屯戍朝廷厭其無能為也乃廢劉豫達蘭以左副元帥守汴京於是倫適至達蘭

太祖從父兄弟於熙宗為祖行太宗長子宗磐以太師領三省事位在宗幹上宗翰薨已久宗幹不能與宗磐獨抗明年天眷元年達蘭與東京留守宗雋俱入朝熙宗以宗雋為左丞相宗雋太祖子也達蘭宗磐宗雋三人皆跋扈嗜利陰有異圖遂合議以齊地與宋自宗幹以下爭之不能得以侍郎張通古為詔諭江南使遣倫先歸明年宋以倫為端明殿學士簽書樞密院事進金器千兩銀器萬兩復來請天水郡王喪柩及請母韋氏

兄弟宗族等保信軍節度使藍公佐副之是歲宗磐宗  
雋達蘭皆以謀反屬吏熙宗誅宗磐宗雋以達蘭屬尊  
赦其死以為行臺尚書省事左丞相奪其兵權右副元  
帥宗弼奏曰達蘭宗磐陰與宋人交通遂以河南陝西  
地與宋人會達蘭復謀反捕而殺之於祁州倫至上京  
有司詳讀康王表文不書年閱進奉狀稱禮物不言職  
貢上使宰相責問倫曰汝但知有元帥豈知有上國耶  
遂留不遣遣副藍公佐歸三年五月宗弼復攻取河南

陝西地遂伐江南已渡淮皇統元年宋人請和三年二月宋端明殿學士何鑄容州觀察使曹勛進誓表三月遣左副點檢色哩山東西路都轉運使劉洵送天水郡王喪柩及宋帝母韋氏還江南五月李正民畢良史南歸七月朱弁張邵洪皓南歸四年以倫為平州路轉運使倫已受命復辭遜上曰此反覆之人也遂殺之於上京年六十一

贊云孔子曰行已有恥使於四方不辱君命可謂士矣

宇文虛中朝至上京夕受官爵王倫紈袴之子市井為  
徒此豈行已有恥之士可以專使者耶二子之死雖寃  
其自取亦多矣



金史卷七十九

欽定四庫全書蒼要卷六千三百二十二

金史卷八十

元中書右丞相總裁托克托等修

列傳第十八

熙宗二子

濟安 道濟

錫默阿里 托克索 烏雅富埒琿 持嘉暉

大臭 本名托卜嘉 磐 本名富色克 阿里布 子方

熙宗諸子悼平皇后生太子濟安賢妃生魏王道濟

濟安皇統二年二月戊子生於天開殿上年二十四始  
有皇子喜甚遣使馳報明德宮太皇太后五日命名大  
赦天下三月甲寅告天地宗廟丁巳翦鬚奏告天地宗  
廟戊午冊為皇太子封皇后父太尉和坦為王賜人口  
馬牛五百駝五十羊五千隨朝職官並遷一資皆有賜  
已未詔天下十二月濟安病劇上與皇后幸佛寺焚香  
流涕哀禱曲赦五百里內罪囚是夜薨謚英悼太子葬



興陵之側上送至烏濟赫水而還命工塑其像于儲慶寺上與皇后幸寺安置之海陵毀上京宮室寺亦隨毀道濟皇統三年命為中京留守以直學士阿蘭為都提點張玄素為同提點左右輔導之俄封魏王封其母為賢妃初居外至是養之宮中未幾熙宗怒殺之

贊曰國初制度未立太宗熙宗皆自安班貝勒即帝位安班貝勒者漢語云最尊官也熙宗立濟安為皇太子始正名位定制度焉

錫默阿里父歡塔穆宗時內附數有戰功阿里年十七從伯父和摩爾噶討卓多獲其弟薩勒札高麗築九城於海蘭旬歡塔攻之遇敵於穆爾茂旬力戰久之阿里挺槍馳刺其將於陣中敵遂潰歡塔與碩碩歡合兵於圖們水阿里首敗敵兵取其二城高麗入寇以我兵屯守要害不得進乃還阿里追及于海蘭水高麗人爭走水上阿里乘之殺畧幾盡遂合兵于碩碩歡道遇敵兵五萬擊走之又與碩碩歡遇敵七萬阿里先登奮擊大

敗之碩碩歡曰汝一日之間三破重敵功豈可忘乃厚  
賜之哈薩額特布攻圖吉城阿里鑿墉為門日已暮不  
可入以兵守之旦日遂取其城額特布以被甲并乘馬  
賜之從攻下寧江州授明安又從攻信州賓州皆克之  
遼人來攻貝勒和索哩城阿里率百餘騎救之遼兵數  
萬阿里兵少乃令軍士裂衣多為旗幟出山谷間遼兵  
望見遁去蘇復州叛衆至十萬旁近女直皆保於太尉  
和碩家築壘為固敵圍之數重守者糧芻俱盡牛馬相

食其鬢尾人易子而食夜縋二人出告急于阿里阿里  
赴之內外合擊之大破其衆於必爾罕水上勦殺幾盡  
水為之不流富埒赫哈爾吉水馬韓島凡十餘戰破數  
十萬衆契丹奚人聚舟千艘將入于海阿里以二十七  
舟邀之中流矢卧舟中中夜始蘇敵船已入王家島即  
夜取海路追及之敵走險以拒阿里以騎兵邀擊再中  
流矢力戰不退竟破之盡獲其舟於是蘇復州博索路  
皆平攻顯州下靈山縣取梁魚務敗伊都兵功皆最後

與蘇都哩屯高州契丹扎古雅糾堅合興中兵數萬攻和爾台寨阿里以八穆昆兵救之和爾台先往敗於城下阿里指陣前緋衣者二十餘人曰此必賊酋也虜兵奮擊皆殺之餘衆大潰來州隰州兵圍和爾台城聞阿里來救即解圍去棟摩討張覺有兵出樓峯口山谷間阿里蘇都哩呼拉布三明安擊敗之宗望代棟摩討張覺阿里再敗平州兵及伐宋阿里別擊宋兵敗之孟陽之役阿里扼橋渡力戰明年再伐宋至保州中山累破

之進圍真定阿里與羅索赫魯乘風縱火焚其樓櫓諸  
軍畢登克其城師至河鈕祜祿呼遜擊走宋人扼河津  
兵數千遂渡河諸將分出大名境阿里破敵四百盡殪  
遂圍汴汴中夜出兵來焚攻具阿里與穆昆察遜伊克  
禦之其衆大潰還攻趙州降之六年伐宋主取陽穀莘  
縣敗海州兵八萬人海州降破賊船萬餘於梁山泊招  
降滕陽東平泰山羣盜盜攻范縣擊走之獲船七百艘  
宗弼攻下睢陽與烏雅富埒瑄先以二千人往招壽春

具舟淮水上時康民聚賈船四百與壽春相近珠爾蘇以騎四百破康民斬馘數千與當堪大臭破賊十萬於淮南北至江連破宋兵獲舟二百艘宗弼至江寧阿里富埒瑋別降廣德軍先趨杭州去杭十餘里遇宋伏兵二千取我前驅甲士三十人阿里使諸軍去馬搏戰伏兵敗皆逼死於水宗弼至餘杭而宋主走明州阿里與富埒瑋以精騎四千襲之破東關兵濟曹娥江敗宋兵於高橋鎮至明州頗失利宋主已入于海乃退軍餘姚

宗弼使當堪濟師遂下明州執宋守臣趙伯諤進至昌  
國縣宋主自昌國走温州由海路追三百餘里弗及遂  
隕明州與宗弼俱北歸睿宗經畧陝西駐涇州阿里先  
取渭州睿宗趨熙河阿里綏赫韓常三明安為前軍十  
二年與高彪監護水運宋以舟師阻亳州河路擊敗之  
追殺六十餘里獲其將蕭通破漣水水寨賊盡得其大  
船遂取漣水軍招徠安輯之天眷間盜據石州阿里討  
之鈕祜祿呼遜與所部先登克其城石州平宗弼再伐



宋阿里已老督造戰船宋稱臣詔賜阿里錢千萬自結髮從軍大小數十戰尤習舟楫江淮用兵無役不從時人以水星目之為德呼勒部節度使歷順義泰寧軍歸德濟南尹天德初致仕加特進封王正隆例封韓國公召赴闕命造戰船以疾薨年七十八謚智敏阿里性忠直多智畧兄弟相友愛家故饒財以已明安及財物盡與弟阿布哩阿布哩不肯受逃避歲餘阿里終與之

托克索宗室子納罕塞人初隸萬戶實嘉努麾下嘗領

偏師破雲中諸山寇盜宗望攻平州遣托克索討應州  
賊平之撫安其衆而還及伐宋在宗翰軍以八穆昆破  
石嶺關屯兵數萬殺戮幾盡師至太原祁縣降而復叛  
托克索攻下之進取文水縣後從諸師列屯汾州之境  
宋河東軍帥郝仲連張思正陝西軍帥張闢索及其統  
制馬忠合兵數萬來援皆敗之宗翰南伐至潞還太原  
猶未下即留完顏尼楚赫總督諸軍經畧其地於是宋  
援兵大至托克索從瑪武烏魯破宋兵四千于文水聞

宋將黃迪等以兵三十萬柵于縣之西山復與耿守忠合兵九千擊之殺八萬餘人獲馬及資糧甚衆宋制置使姚古率兵至隆州谷托克索與巴爾斯以步騎萬餘禦之种師中兵十萬據榆次尼楚赫乃召托克索使中分其兵而還與和尼等合兵五千擊敗之斬師中于殺熊嶺宋將張灝以兵十萬營于文水近郊復與巴爾斯擊破之潞州復叛宋兵號十七萬固納托克索巴爾斯皆被圍托克索麾軍士下馬力戰遂潰圍而出及再舉

伐宋宗翰命羅索率軍先趨汴羅索至澤州托克索烏  
魯以五百騎為前驅往招河陽先據黃河津宋兵萬餘  
背水陣進擊敗之皆擠于水遂降河陽汴京平諸將西  
趣陝津畧定河東郡縣托克索取憲州遇其援軍擊敗  
之生擒其將貝勒寧溫珠魯等攻保德未下托克索進  
兵助擊梯衝並進遂克其城貝勒烏爾古攻石州亡其  
三將軍士死者數百人托克索謂烏爾古曰敵皆步兵  
吾不可騎戰烏爾古曰聞賊挾妖術畫馬以繫其足疾

甚奔馬步戰豈可及之托克索笑曰豈有是耶乃令諸軍去馬戰盡殪之六年宗輔駐師鄧州托克索瑪武巴爾斯西取均房遂下其城攻唐蔡陳州及潁昌府皆克之天眷初除彰德軍節度使三年為元帥左監軍皇統八年改濟南尹天德間封定國公授世襲千戶辛年七十二正隆二年贈應國公初托克索以次室受封次室子因得襲其明安及分財異居次室子取奴婢千二百口正室子得八百口久之正室子爭襲連年不決家憤

費且盡正室子奴婢存者二百口次室子奴婢存者纔五六口世宗聞托克索諸子貧窘以問近臣具以爭襲之故為對世宗曰次室子豈當受封耶遂以嫡妻長子襲

烏雅富埒琿海蘭路烏克敦山人父巴古刺為龍虎衛上將軍富埒琿力絕人能挽強射二百七十步與兄呼沙呼俱以勇健隸棟摩軍居帳下攻黃龍府力戰有功棟摩敗于兔耳山張覺復整兵來諸將皆不敢戰富

埒瑄登山望之乃給諸將曰敵軍少急擊可破也若入城不可復制遂合戰破之郭藥師蔡靖以燕京降富埒瑄率九十騎先伺察城中居民去就遂將漢兵千隸完顏蒙克攻真定進攻贊皇取之獲人畜甲仗萬餘汴城破日已暮宋人猶力戰槍刺中富埒瑄手戰益力遂敗宋軍賜金五十兩睿宗為右輔元帥已定關陝議取劍外諸州遂拔和尚原元帥府承制以富埒瑄為河北西路兵馬都總管及宋主在揚州富埒瑄與蒙克將萬騎

襲之宋主已渡江破其餘兵後與錫默阿里俱從宗弼  
自淮西渡江取江寧宗弼入杭州宋主走明州再走溫  
州由海道追三百餘里隳明州而歸語在阿里傳天眷  
二年授鎮國上將軍除安國軍以疾去官皇統六年授  
世襲穆昆起為延安尹賜尚衣一襲尋致仕海陵遷中  
都起為歸德尹就其家授之賜銀牌襲衣玉吐鶻馳驛  
之官富埒琿留數十日已違程復聽致仕召赴京師至  
薊州見海陵于獵所明日從獵獲一狐海陵曰卿年老



尚能馳逐擊獸健捷如此賜以御服封幽國公除太子少師進太子太保改真定尹入判太宗正事頃之伐宋以本官行右領軍副都督事師次西采石海陵欲渡江富埒瑋曰宋軍船高大我船卑小恐不可遽渡海陵怒曰汝昔從梁王追趙構於海島皆大舟耶今乃沮吾兵事設不能遽渡江不過有少損耳爾年已七十縱自愛豈有不死理耶明日當與瑣都先濟既而復止之乃遣別將先渡江舟小不可戰遂失利兩明安及兵士二百

餘人皆陷沒海陵遇害軍還大定二年至中都上謁除  
東京留守世宗召問年幾何對曰臣今年七十三矣上  
曰卿宿將久練兵事年雖老精神不衰因命到官每旬  
月一視事賜衣一襲進階開府儀同三司仍封幽國公  
是歲卒十八年孫扎昆遷廣威將軍襲烏克敦山世襲  
明安并親管穆昆

持嘉暉字仲明其先附於遼居張皇堡故嘗以張為氏  
後家來州暉體貌雄偉慷慨有志畧少遊鄉校遼季以

破賊功授禮賓副使領來隰遷潤四州屯兵天輔六年  
降仍命領其衆從棟摩定興中府義錦等州及破張覺  
皆與有功以粟萬五千石助軍授洛州刺史宗望初伐  
宋孟陽之戰敵之中軍徑薄宗望營暉與諸將擊敗之  
追殺至城下訖師還數立戰功明年再舉伐宋攻下保  
州真定暉皆與焉進圍汴宋人夜出兵二萬焚我攻具  
暉以二穆昆兵擊走之凡城中出兵拒戰暉之所當無  
不勝捷既克宋還從攻河間敵將李成以雄莫之兵來

援暉與所部迎擊馬傷而墮暉輒奮起步鬪竟敗成兵  
是日凡七戰皆勝敵人多逼死濠隍間暉兩臂亦數中  
流矢賊將劉先生以兵二萬夜襲營暉力戰達旦賊始  
敗走皆溺死于水暉復傅城力戰如是連月諸軍四面  
合兵遂克之加桂州管內觀察使因留撫河間時居民  
皆為軍士所掠老幼存者亡幾暉下令軍中聽贖還之  
未幾皆安堵如故從睿宗經畧山東既攻下青州復從  
棟摩攻濰州暉督其裨校先登而城中積芻芡乘風縱

火發機石暉率將士衝冒而下力戰敗之軍還復以三十騎破敵于范橋帥府承制加靜江軍節度使進攻城中砲出幾中暉拂其甲裳裂之暉益奮攻卒破其城又從攻泗州克之還屯汝陽破賊衆于梁山灤獲舟千餘移軍攻濟州既敗敵兵因傳城諭以禍福乃舉城降暉約束軍士無秋毫犯自是曹單等州皆聞風而下從攻壽春歸德及渡淮為先鋒遇重敵于秀州蘇州皆擊敗之遂至餘杭通糧餉治橋道暉之力為多乃還載資治

通鑑版以歸大軍過江寧徙其官民北渡時暑多疾疫  
老弱轉死道路其知府陳邦光者訴于宗弼怒將殺之  
暉曰此義士也力營救之竟得免富平之戰暉左右翼  
遇淳而敗睿宗念其前功杖而釋之師至熙河暉別降  
諸寨將鈴轄及吐蕃酋長等并民戶萬五千餘蘭州叛  
與鄂勒博等攻下之獲河州安撫使白常熙河路副都  
總管劉維輔以獻還攻慶陽兩敗重敵殺其將戴巢師  
還還歸德軍節度使宋州舊無學暉為營建學舍勸督

生徒肄業者復其身人勸趨之屬縣民家奴王夔者嘗業進士暉以錢五十萬贖之使卒其業夔後至顯官密州吏龐乙卒於官其孤貧不克葬暉為營治葬事且資給其家十三年復從大軍渡淮還鎮丁母憂尋以舊職起復既廢齊為安化軍節度使天眷二年復河南宋人乘間陷海州帥府以登萊沂密四州委暉經畫敵無敢窺其境者為定海軍節度使尋改濟南尹累遷光祿大夫俄以罪罷久之起為昌武軍節度使天德二年遷南

京留守尋改河南路統軍使授世襲明安拜尚書右丞  
封河內郡王歲餘拜平章政事封戴王正隆初出為興  
平軍節度使正隆降王爵為樞密副使封景國公未幾  
復為左丞封濟國公尋除大興尹封榮國公薨年六十  
五大定間謚曰武康子師直登進士第

大奧本名托卜嘉其先遼陽人世仕遼有顯者太祖伐  
遼遼人徵兵遼陽時奧年二十餘在選中遼兵敗奧脫  
身走寧江寧江破奧越城而逃為軍士所獲太祖問其



家世因收養之收國二年為東京奚民穆昆是時初破  
高永昌東京旁郡邑未盡服屬使臬伺察反側有聞必  
達太祖以為忠實授明安兼同知東京留守事取中西  
兩京隸棟摩軍遼軍二十萬來戰吳王使臬以本部守  
營臬堅請出戰不許或謂臬曰戰危事獨苦請何也臬  
曰丈夫不得一決勝負尚何為苟臨戰不捷雖死猶生  
也吳王聞而壯之乃遣出戰既合戰棟摩軍少却遼兵  
後躡之臬麾本部兵橫擊殺數百人由是顯名軍中天

會三年宗望伐宋信德府居燕汴之間可駐軍以濟緩急欲遂攻之恐不能亟下議未決臭獨率本部兵選善射者射之城樓別以輕銳潛升於樓角之間遂克其城軍至瀋州宋人已燒河橋宗望下令軍中有能先濟者功為上臭捕得十餘舟使勇悍者徑渡擊其守者而奪其戍柵由是大軍俱濟明年再伐宋授萬戶賜金牌既破汴京臭為河間路都統已克河間棟摩怒其不早降因縱軍大掠臭諫止之已掠者官為贖還除河間尹從

攻襲慶府先一日臭命軍士預備畚鍤及薪既傅城諸將方經營攻具未鳴鼓臭軍有素備遂先登軍帥以臭未鳴鼓輒戰不如軍令請罪臭朝廷釋弗問仍例賞之宗弼伐江南濟淮宋將康民率兵十七萬來拒時臭率本部從擊敗之復以騎二千與當堪擊敗淮南賊十萬殺萬餘人王善來降將渡江臭軍先渡舟行去岸尚遠宋列兵江口臭視其水可涉則麾兵捨舟趨岸疾擊之宋兵走大軍相繼而濟俄遇杜充兵六萬於江寧之西

臭與呼拉布擊走之師還臭留為揚州都統經畧淮海  
高郵之間再為河間尹兼總河北東路兵馬十一年入  
見太宗賜坐慰勞甚久特遷太子太保賜衣一襲馬二  
匹及鞍轡鎧甲改元帥右都監齊國廢臭守汴京熙宗  
念臭久勞降御書寵異之天眷三年罷漢渤海千戶穆  
昆以臭舊臣獨命依舊世襲千戶是歲拜元帥右監軍  
宗弼再伐宋宋人稱臣乞和遂班師臭獨留汴行元帥  
府事皇統三年加開府儀同三司八年進左監軍天德

二年改右副元帥兼行臺右丞遷平章行臺省事進行  
臺右丞相右副元帥如故海陵疑左副元帥薩里罕以  
為行臺左丞相使臬伺察之詔軍事不令薩里罕與聞  
薩里罕不知海陵意旨每與臬爭軍事不能得遂與臬  
有隙海陵竟殺薩里罕召臬入朝拜尚書右丞相封神  
麓郡王四年請老為東京留守貞元三年拜太傅領三  
省事累封漢國王十二月有疾海陵幸其第問之是歲  
薨年六十八海陵親臨哭之詔有司廢務三日禁樂三

日其三日當賜三國使館燕以不賜教坊樂命左宣徽使敬嗣暉宣諭之贈太師晉國王謚傑忠遣使護喪歸葬正隆奪王爵贈太傅梁國公子磐

磐本名富色克以大臣子累官登州刺史襲明安大定三年除嵩州刺史從布薩忠義伐宋有功五年召為符寶郎遷拱衛直都指揮使初磐以伐宋功進官一階磐心少之頗形於言上聞之下吏按問杖一百五十改左衛將軍詔求良弓磐求自取及護衛入直者輒以已意

更代護衛羅索告其事詔點檢司詰問磐有妹在宮中  
為寶林磐屬內侍僧兒員思忠使言于寶林曰我無罪  
問事者迫我使自誣服寶林訴于上上怒杖僧兒一百  
磐責隴州防禦使上戒之曰汝在近密執迷自用朕以  
卿父之功不忍廢棄姑令補外其思勉之改虜州防禦  
使遷武寧軍節度使坐事除名起為韓州刺史改祁州  
刺史復坐事削四官解職久之尚書省奏大磐以年當  
叙上曰剛暴之人屢冒刑章不可復用太傅大臬別無

嫡嗣其世襲明安穆昆不可易也

阿里布宗室子系出景祖屢從征伐滅遼舉宋皆有功  
天會九年睿宗經畧陝西阿里布為左翼都統與右翼  
都統宗弼撫定鞏洮河西寧蘭廓等州軍來賓定遠和  
政甘峪寧洮安隴等城寨及鎮堡蕃漢營部四十餘處  
漢官軍民蕃部酋長甚衆於是涇原熙河兩路皆平詔  
以凡明安薩勒扎親管穆昆之餘戶以阿里布為世襲  
穆昆天會十二年為元帥右都監十五年遷左監軍天



眷三年從宗弼復河南遷左副元帥皇統三年封譚國  
公六年為行臺左丞相元帥如故是歲薨大定間大褒  
功臣圖像衍慶宮罕都死康宗時不及與馳騫遼宋之  
郊然而異姓之臣莫先焉故定衍慶亞次功臣代國公  
罕都金源郡王寶圖美徐國公瑋楚鄭國公們圖瑋濮  
國公寶古納濟國公芬徹韓國公錫默阿里元帥左監  
軍巴爾斯魯國公富察寶嘉勞銀青光祿大夫蒙克隨  
國公和尼特進托克索齊國公博勒和開府儀同三司

烏雅富埒輝儀同三司阿里布鎮國上將軍烏陵阿托  
雲太師領三省事勗太傅大興大興尹持嘉暉金吾衛  
上將軍耶律瑪武驃騎衛上將軍韓常并阿里布咸著  
勳馬子言方言別有傳

方以宗室子累官京兆少尹遷陝西路統軍都監方專  
事財賄不恤軍旅詔戒之曰卿宗室舊人乃縱肆敗法  
惟利是營朕甚惡之自今至於後日萬一為之必罰無  
赦大定三年遷元帥右都監轉元帥左監軍改順天軍

節度使上曰卿本無功歷顯仕不能接僚友往往交惡  
在京兆貪鄙彰聞至無謂也朕念卿已過中年必能悛  
改慎勿復爾除西南路招討使朝廷以兵部郎中高通  
為招討都監以佐之詔通曰卿到天德毋以其官長曲  
從之也簡閱沿邊士卒毋用孱弱之人毋以僕隸代役  
女直舊風凡酒食會聚以騎射為樂今則奕棊雙陸宜  
悉禁止令習射騎從其居處之便亦不可召集擾之久  
之方坐強買部人馬二匹削一階解職降耀州刺史通

亦坐賊除名方後遷橫海軍節度使入為同簽大宗正  
事簽書樞密院事初阿魯當授穆昆未封而薨烏達受  
之烏達死烏達布襲之烏達布死烏雅鄂博當襲是時  
已降海陵為庶人世宗以烏達在熙宗逆黨中其子孫  
不合受封停封者久之而阿里布功亦不可廢絕特詔  
方襲之云

贊曰錫默阿里托克索烏雅富勒琿持嘉暉大臭阿里  
布等六人皆收國以來所謂熊羆之士不二心之臣也

其功有可錄者焉

金史卷八十

欽定四庫全書蒼要卷六千三百二十三

金史卷八十一

元中書右丞相總裁托克托等修

列傳第十九

赫本頗

德克德

額圖琿

瓜爾佳實納

珠勒根穆都哩  
洪果達呼布

富察和珍

瓜爾佳沃哩布

王伯龍

高彪  
本名昭和碩

溫特赫富拉塔 伯特德哩布

耶律懷義  
本名伯特  
蕭旺嘉努

田灝 趙賊

赫木頗珠卜奇水錫默部人性忠直寬厚重節義勇於  
戰父阿古圖贈金吾衛上將軍穆宗時赫木頗內附先  
遣子寧嘉從間道送款遂使和勒端與赫木頗合軍攻  
降諸部因領其衆與弟和摩爾噶歡塔姪阿里攻下諸



城從薩哈破烏塔城穆宗屢賞之破高麗戍兵與碩碩  
歡討平諸部富察部雅里貝勒與其兄弟和拜松科等  
欲叛歸遼赫木頗執之送於康宗賜賚甚厚破高麗海  
蘭甸及下托囉城有功天輔六年卒年七十三天眷中  
贈銀青光祿大夫

德克德溫特赫部人祖哲克納父呵古岱世為和掄水  
部長德克德年二十餘代領父穆昆攻寧江州敗遼援  
兵獲甲馬財物攻破奚營回至韓州遇敵二千人擊走

之烏楞古與遼人戰於咸州兵已却德克德以本部兵力戰諸軍復振遂大破之呼岱巴岡之役伊里布貝勒陷敵中德克德援出之攻黃龍府身被數創授明安天輔七年從上至山西病卒年四十七天眷中贈光祿大夫

額圖琿溫特赫部人年十七從薩哈威泰等討平諸部皆身先力戰高麗築九城於海蘭甸烏色禦之額圖琿為前鋒高麗有屯於海島者額圖琿率衆三十人夜渡

焚其營柵戰艦大破之遂下圖吉城既而八城皆下功  
最遼兵自寧江州東門出額圖瑋逆擊盡殪之以功授  
穆昆從攻黃龍府力戰身被數十創竟登其城後與鄂  
蘭沙津援昭蘇城額圖瑋請乘不備急擊之遂夜過伊  
圖水詰朝大敗之幹魯上其功賜幣與馬天輔四年五  
月疾病賜良馬一匹詔曰汝安則乘之年六十五卒上  
悼惜之遣使弔祭以馬為贈額圖瑋為人孝悌好施惠  
健捷善弋獵至角觝擊鞠咸精其能

瓜爾佳實訥隆州納爾琿河人國初祖阿哈率所部降  
獻器用甲仗父布爾噶蘇襲本部貝勒從太祖伐遼授  
世襲明安親管穆昆為海蘭路都統實訥其長子也長  
身多髯善騎射通女直契丹大小字及漢字既冠隨其  
父見太祖命佩金牌總領左翼護衛西京未下實訥獲  
城中生口乃知城中潛遣人求救於外都統府得為之  
備却其救兵西京乃下自燕京還過盤尼納之地遇敵  
於隘實訥身先士卒射殺敵中先鋒二人敵潰走總管

富勒呼以甲及馬贈之後領其父明安從攻和尚原出  
仙人關宋兵據險明安綽爾齊突戰不克實訥選麾下  
五十人戰克之與吳玠相拒烏里雅行陣不整吳玠乘  
之實訥領兵逆戰遂大破敵計前後功襲其父明安穆  
昆宗弼復取河南陝西宋人欲潛兵襲取石閨諸營實  
訥自渭南大禹鎮掩其伏兵射中其軍帥宋兵敗走多  
獲旗幟兵仗帥府厚賞之除華州防禦使入為工部侍  
郎遷本部尚書改平涼尹昭義軍節度使大定初卒

珠勒根穆都哩上京納琳河人也後徙咸平路梅赫河  
雄偉美鬚髯勇毅善射國初伐遼穆都哩在軍中領穆  
昆明安每遇敵往來馳突人敢莫當故所戰皆克皇統  
元年計功擢宣威將軍明年授同知通遠軍節度使改  
伊埒圖紉詳袞授世襲本路音達琿河穆昆為滑州刺  
史改肇州防禦使扶餘路節度使遷驃騎上將軍是歲  
以年老致仕卒累官金吾衛上將軍年七十三

洪果達呼布世居錫馨水從破寧江取咸平州東京路

及諸山寨柵皆有功從瑪竒破遼將和尚節使兵七千於上京復破納延軍二萬再從瑪竒遇敵於阿林甸瑪竒被創不能戰達呼布率兵擊敗之勦殺殆盡從攻回鶻城破其兵九萬敗瑪爾戩直薩兵於山後俘獲甚衆敗扎古雅兵三千獲其家屬而還攻平州張覺烏春被圍於西山達呼布引兵殺之解其圍並獲糧五千斛招降戶口甚衆從平興中撫安其民人天會間大軍伐宋達呼布從取濬開德大名及取濟南高唐棣密等州皇

統間以功襲穆昆移屯於壽光縣界為千戶六年授世襲千戶棣州防禦使卒

富察和珍按春水人也年十八從軍其父塔斯死襲為穆昆天輔間夏以兵三萬出天德路和珍從羅索迎戰以兵三百敗敵一千天會三年大軍攻太原城中出兵萬餘來戰和珍以所領千戶軍擊之復敗敵兵三萬餘於榆次境六年從羅索攻京兆以所部兵屢與宋人接戰皆先登有功七年取邠州遇宋人二十餘萬我軍右



翼少却時和珍為左翼千戶摧鋒陷陣敵遂敗去敗張  
浚富平復有功十二年擊閔師古於臨洮衆三萬餘從  
攻涇州從破德順秦鞏臨洮河蘭等州破吳璘兵和珍  
皆有力焉授德順州刺史改隴州防禦使鳳翔尹卒年  
五十五

瓜爾佳沃哩布南圖琿河人徙天德父溫屯討烏春烏  
木罕有功沃哩布隸羅索帳下攻係遼女直招降達哈  
藩昭蘇等從羅索救烏楞古于咸州敗遼兵于雅勒呼

城遼軍營遼水沃哩布五穆昆軍乘夜擊之遼軍潰殺  
獲幾盡斡魯伐高永昌沃哩布以數騎奮擊於遼水上  
復以四十騎伏于津要遇其侯騎擊之獲生口因盡知  
永昌虛實太祖嘉之賞奴婢八人永昌駐軍於兔兒陀  
先據津要軍不得渡沃哩布與薩巴射殺其先鋒二人  
永昌衆稍却大軍遂渡遼水及攻廣寧軍帥選勇士先  
登沃哩布與持嘉和木歡各領所部突入其陣大軍繼  
之遂拔廣寧太祖攻臨潢沃哩布面被重創奮擊自若

賞以遼宮女二人遼王杲已取中京沃哩布以四十騎  
覘敵獲遼喉舌人因知遼主所在後從都統幹魯定雲  
中從宗翰屯應州遼軍在近境沃哩布以所部擊敗之  
宗望伐宋宋安撫使蔡靖詣沃哩布降羅索攻陝西諸  
郡往往復叛沃哩布攻敗之敗張浚軍于富平沃哩布  
先登睿宗賞以金器名馬遂以先鋒攻蘭州下其城加  
昭武大將軍授世襲明安累官布塔布部族節度使以  
老致仕封芮國公沃哩布多智畧膂力過人雖甚老勇

健不少衰大定初劇賊嘯聚出特布閱沃哩布率鄉里  
年少逆擊之賊黨遂潰事聞賞賚甚厚大定二十六年  
卒一百有五歲

王伯龍潘州雙城人也遼未聚黨為盜天輔二年率眾  
二萬及其輜重來降授世襲明安知銀州兼知雙州三  
年太祖攻臨潢伯龍與韓慶和以兵護糧餉輓夫千五  
百人皆授甲慶和已將兵行前伯龍從糧居後遇遼兵  
五千餘邀於路伯龍率輓夫擊敗之獲馬五十匹四年

從攻下中京并克境內諸山寨為靜江軍節度使留後  
五年真授節度使從宗望討張覺於平州伯龍先登馳擊  
手殺數十百人遷右金吾衛將軍白河之戰伯龍當其  
左軍麾兵疾馳蹂之宋軍亂我師乘勝擊奮敗之宗望  
伐宋伯龍為先鋒次保州遇敵五萬破之招降新樂軍  
民十餘萬大軍圍汴宋太尉何臬以軍數萬出酸棗門  
伯龍以本部遮擊多所斬獲及破汴伯龍以治攻具有  
功進破孔彥舟鄴瓊衆三萬於洺州是年同知保州兵

馬安撫司事將兵數千攻北平拔之復取保州河間睿宗經累山東伯龍從攻青州未下城中夜出兵襲伯龍營伯龍不及甲獨被衣挺刃拒營門敵不得入因奮擊殺數十人已而軍士皆甲出殺傷宋兵不可勝計并獲其一將斬之及下青州第功伯龍第一六年還攻莫州降之加太子少保莫州安撫使破李固寨衆十餘萬於濮州濮城守城中鎔鐵揮我軍攻之不能剋伯龍被重甲首冠大釜挺槍先登殺守陴者二十餘人大軍相繼

而上遂剋之進攻徐州伯龍復先登充徐宿邳三路軍  
馬都統敗高托山之衆十五萬餘於清河進擊韓世忠  
於邳州走之與大軍會於宿遷追世忠至揚州還攻泗  
州泗州守將以城降屯軍滋陽破陳宏賊衆四十餘萬  
破黃戩於單州進攻歸德軍帥遣伯龍立攻具伯龍從  
二十餘騎行視地形城中忽出兵千餘欲生得伯龍伯  
龍縱騎馳之敵兵亂墮隍而死者幾二百人破王善之  
衆於巢縣取廬州和州伯龍之功多軍渡采石擊敗岳

飛劉立路尚等兵獲芻糧數百萬計還過真揚道遇鄴  
瓊韓世忠軍復戰敗之復為莫州安撫改知澤州太行  
羣賊往往嘯聚伯龍皆平之天眷元年為燕京馬軍都  
指揮使從元帥府復收河南權武定軍節度使兼本路  
都統宋兵據許州伯龍擊走之招復其人民是年秋泰  
安卒徒張貴驅脅良民據險作亂伯龍討平之皇統元  
年以本部從宗弼南伐攻破濠州而還三年為武定軍  
節度使改延安戶寧昌軍節度使天德三年改河中尹



徙益都尹封廣平郡王卒年六十五正隆間例贈特進  
定國公

高彪本名昭和碩辰州渤海人祖安國遼興辰開三鎮  
節度使父祿格左承制官至刺史彪始生其父用術者  
言為其時日不利於己欲不舉其母為營護居數歲竟  
逐之彪匿於外家遼人調兵東京時祿格已老當從軍  
悵然謂所親曰吾兒若在可勝兵矣所親具以實告因  
代其父行戰於珠赫店遼兵敗走彪獨力戰軍帥見之

曰此勇士也令生致之幹魯攻東京祿格率其鄉人迎降以為榆河州千戶久之告老彪代領其衆都統杲攻中京彪領穆昆從幹魯破遼將克爾叟及韓慶民於高惠之境已而駐軍武安克爾叟以勁兵二萬來襲從幹魯出戰與所部皆去馬先登奮擊敗之奚人負險拒命所在屯結彪屢戰有功宗望攻平州彪徇地西北道破敵招降石家山寨再從宗望伐宋為明安師次真定彪率兵士七十人臨城築甬道城中夜出兵焚攻具彪擊

走之大軍圍汴以五十騎屯於東南水門宋人再以重  
兵出戰彪皆敗之師還屯鎮河朔復破敵於霸州擒其  
裨將祝昂河間夜出兵二萬襲我營壘彪率三穆昆兵  
擊敗之天會五年授靜江軍節度使壽州刺史明年伐  
宋從帥府徇地山東攻城克敵數被重賞七年師至睢  
彪以所部招誘京西民人次柘縣其官吏出降彪獨與  
五十餘騎入城繼而城中三千餘人復叛彪率其衆力  
戰敗之撫安其民而還從梁王宗弼襲康王至杭州師

還宗將韓世忠以戰艦數百扼於江北京弼引而西將至黃天蕩敵舟三十餘來逼南岸其一先至者載兵士二百餘彪度垂及以鈎拽之率勇士數十躍入敵舟所殺甚衆餘皆逼死於水中明年從攻陝西師至寧州彪與宗人昂率兵三千取廓州始至有來降者言城東北隅守兵將謀為內應彪即夜從家奴二人以登左右守者覺之彪與從者皆殊死戰諸軍繼進遂克其城從攻和尚原及仙人關與阿里監護漕糧并戰艦至亳州宋

人以舟五十艘阻河路擊敗之擒其將蕭通擊漣水賊  
水寨進取漣水軍其官民已遁去悉招降之彪勇健絕  
人能日行三百里身被重鎧厯險如飛及臨敵身先士  
卒未嘗反顧大小數十戰率以少擊衆無不勝捷齊國  
既廢攝滕陽軍以東諸路兵馬都統撫諭徐宿曹單滕  
陽及其屬邑皆安堵如故為武寧軍節度使頗躋貨嘗  
坐賊海陵以其勲舊杖而釋之改忻州防禦使厯安化  
安國武勝軍節度使遷行臺兵部尚書改京兆尹封郅

國公以憂去官起復為定武軍節度使歸德尹正隆例授金紫光祿大夫久之致仕復起為樞密副使舒國公賜名彪卒年六十七諡桓壯彪性機巧通音律人無貴賤皆溫顏接之

溫特赫富拉塔隆州伊蘭明安噶勒珠寨人也魁梧美髯有謀畧以智勇聞都統杲取中京富拉塔權明安領軍五千遇契丹賊萬餘與戰敗之出恭古魯道敗敵八千餘至拉們華道復以伏兵敗敵萬人太祖定燕自儒

州至居庸關執其喉舌人有頃賊三千餘人復寇拉們  
華道富拉塔整隊先登賊識其旗幟望風而遁遂奮擊  
之親執賊帥皇統元年從梁王宗弼伐宋留軍唐州敵  
衆奄至富拉塔擊之大名軍萬四千號二十萬富拉塔  
率親管明安身先士卒衝擊敵少却乃張左右翼併擊  
之敵衆散走而別遇兵二萬來援復以兵三千擊走之  
時邳州土賊嘯聚幾二十萬富拉塔軍三千分為數隊  
急攻之賊潰去南京路遇敵軍二萬富拉塔以軍三千

擊敗之是日有兵自城中出者復擊之敗皇統二年遷定遠大將軍同知鳳翔尹六年以京兆尹轉寧州刺史改西北路招討都監遷永定軍節度使海陵南征改武衛軍都總管大定三年授開遠軍節度使改泰寧軍卒十九年以功授其子烏達武功將軍本明安希楚哈世襲穆昆

伯特德哩布奚五王族人也遼御院通進天會初與父托卜嘉歸朝授世襲穆昆後以京兆尹致仕德哩布招



降松山等州未附軍民及招降平州薊州境內督之耕  
作宗望伐宋德哩布為軍馬明安與諸將留規取保遂  
安三州攻安肅軍河間雄保等兵十餘萬來救德哩布  
率所部先戰大軍繼之大破其兵遂拔安肅德哩布攝  
通判事降將胡愈陰結衆謀亂德哩布勒兵擒愈及其  
衆五十餘人安肅軍改為州就除同知州事改磁州補  
獲太行羣盜元帥府以磁相二州屯兵屬之擒王會孫  
小十苗清等羣盜遂平遷濱州刺史廉八優等以母憂

去官起復本州改涿州刺史入為工部郎中從張浩營  
繕東京宮室及田穀黨事起朝省為之一空德哩布攝  
行六部事遷大理卿出為同知東京留守天德三年復  
為大理卿同知南京留守丁父憂起復洺州防禦使正  
隆盜起州縣無兵不能禦洺舊有河附于城下德哩布  
乃引水注濠中以為固盜弗能近州賴以安遷崇義軍  
節度使未幾告老歸田里卒德哩布為人孝謹為政簡  
靜不積財常曰祿俸已足養廉衣食之外何用蓄積凡

調官行李止車一乘婢僕數人而已

耶律懷義本名伯特遼宗室子年二十四以戰功累遷同知點檢司事宗翰已取西京遼主謀奔于夏懷義諫止之不見聽乃竊取遼主廐馬來降太祖自燕還師留宗翰幹魯經畧西方懷義領穆昆從軍天會初帥府以新降諸部大小遠近不一令懷義易置之承制以為西南路招討使乃擇諸部衝要之地建城市通商賈諸部兵革之餘人多匱乏自是衣食歲滋畜牧蕃息矣從宗

翰伐宋降馬邑破鴈門屯兵進攻太原以所部別降清源縣徐溝鎮遂與將諸別屯汾州之境時河東陝西路兵來救太原劉光世折可求柵于文水西山懷義捕得生口盡知宋兵屯守要害乃分兵襲敗之明年再伐宋從羅索取汾州及其屬邑遂過平陽出澤潞以趨河陽所至皆降及大軍圍汴懷義屯京西汴城既下宋兵之出奔者邀擊盡之從攻鄭鄧州及討平鄭州叛者攻下濮州及雷澤縣從破大名東平府徐兗等州皆有功七

年還鎮十年加尚書左僕射改西北路招討使懷義在  
西陲幾十年撫御有恩及去老幼遮道攀戀數日不得  
發天眷初為太原尹治有能聲改中京留守從宗弼過  
烏納水還中京以老乞致仕不許改大名尹命不赴治  
所止以俸廉給之每歲春水扈從餘聽自便明年再請  
老得謝給俸廉之半海陵即位封漆水郡王進封莘王  
久之進封蕭王正隆例封景國公其子錫勒塔干為西  
北路招討都監迎侍之官錫勒塔干從海陵南征懷義

卒于雲中年八十二

蕭旺嘉努奚人也居奎騰河為人魁偉多力未冠仕遼  
為太子率府率天輔七年都統杲定奚地旺嘉努率其  
鄉人來降命為千戶領之奚王和勒博既死其親黨徹  
辰阿固齊猶保色克山旺嘉努與托紐往討之生擒徹  
辰阿固齊降其餘衆時平灤多盜旺嘉努以所部屢破  
賊兵斬馘執俘數被賞賚宗望伐宋敗郭藥師於白河  
亦與有功至河上宋兵扼津要與諸將擊敗之進圍汴破

破其東門兵明年再伐宋宗望軍至中山諸門分兵出  
戰焚我攻具祁州河間各以兵來援皆敗之師還屯鎮  
河朔濱州賊葛進聚衆數萬臨淄貝勒卓琳以騎兵二  
千討之旺嘉努領穆昆先登力戰大破其衆明年攻滄  
州宋兵拒戰復從卓琳擊走之宋將徐文以舟百艘泊  
海島即以商船十八進襲斬首七百級獲舟二十天會  
八年除靜江軍節度使授世襲千戶從梁王宗弼征伐  
為萬戶還為五院部節度使天德二年改烏爾古德呼

勒招討都監卒

田灝字默之興中人遼天慶八年進士歷官金部員郎  
郎權歸德節度使太祖定燕灝舉四州版圖歸朝加都  
官郎中權節度使事四遷知真定府事招降齊博游貴  
等賊衆五千餘人已而貴復叛去灝遣齊博偽叛從貴  
因今伺間殺之降其衆賊壘悉平三遷行臺左丞彰德  
軍節度使是時親定力役灝蠲籍之半而上之故相之  
繇賦比他州獨輕徙同知河北東路都總管改同簽燕



京留守司事民遮留不得出易衣夜出改河東南路轉  
運使尋改絳陽軍節度使居三年以疾請謝事徑解印  
歸數奏不允移鎮振武軍入為刑部尚書居三月告老  
卒於家

趙臧字德固遼陽人其婦翁以優伶得幸於遼主臧補  
閣門祇候累遷太子左衛率後居灤州宗望討張覺臧  
踰城出降授洛苑副使為灤州千戶遷洛苑使檢校工  
部尚書從伐宋至汴遷棣州刺史侍衛步軍都虞候及

再伐宋攻真定與有功改商州刺史檢校尚書右僕射  
五年同知信德府路統押軍兵兼沿邊安撫司事明年  
權知濟州事八年從定河南授隴州團練使十年改知  
石州賊久在兵間不善治民坐謗議謫監平州甜水鹽  
齊國廢河南皆以宿將守之授賊宿州防禦使統本路  
軍兵賊重義接儒士嘗以事至汴有故人子負官錢百  
萬賊以橐金贈之其子悉為私費復代輸之頃之有訟  
徐帥不法者朝廷使賊鞠治賊委曲營護坐是廢罷寓

居於燕海陵出領行臺省至燕臧往見之因訴其事及海陵即位起為保大軍節度使貞元初改內省使未幾為中都路都轉運使明年再徙順義興平入為大子詹事鎮沁南以疾卒年六十六後十餘年臧子孫司徒張通古子孫皆不肖淫蕩破貲產賣田宅世宗聞之詔曰自今官民祖先亡沒子孫不得分割居第止以嫡幼主之母致鬻賣仍著於令

金史卷八十一



總校官舉人 臣章維桓

校對官編修 臣顏崇瀋

謄錄監生 臣劉雲瑞

欽定四庫全書薈要

史部  
金史卷八十二至

詳校官編修臣程嘉謨



欽定四庫全書薈要卷六千三百二十四

金史卷八十二

元中書右丞相總裁托克托等修

傳第二十

郭藥師

子安國

耶律圖善

烏雅呼爾哈

烏雅沃哩布

蕭恭

完顏希卜蘇

赫舍哩呼喇

耶律恕

本名稱埒

郭企忠

烏蘇額琳

延扎們都

布薩歡塔

鄭建克

烏庫哩薩哈

伊喇溫

本名阿薩爾

蕭仲恭

本名珠魯準  
子拱

蕭仲宣

本名伊里布

高松

本名搏多

海陵諸子

光英

元壽

舒蘇鄂博

廣陽



郭藥師渤海鐵州人也遼國募遼東人為兵使報怨於女直號曰怨軍藥師為其渠帥烏楞古攻顯州敗藥師於城下遼帝亡保天德耶律聶呼自立改怨軍為常勝軍擢藥師諸衛上將軍聶呼死其妻蕭妃稱制藥師以涿易二州歸於宋藥師以宋兵六千人奄至燕京甄五臣以五千人奪迎春門皆入城蕭妃令閉城門與宋兵巷戰藥師大敗失馬步走踰城以免宋人猶厚賞之太祖割燕山六州與宋人宋使藥師副王安中守燕山及

安中不能庇張覺而殺之函其首以與宗望藥師深尤  
宋人而無自固之志矣宗望軍至三河藥師等拒戰於  
白河兵敗藥師乃降宗望遂取燕山太宗以藥師為燕  
京留守給以金牌賜姓完顏氏從宗望伐宋凡宋事虛  
實藥師盡知之宗望能以懸軍深入駐兵汴城下約質  
納幣割地全勝以歸者藥師能測宋人之情中其肯綮  
故也及兩鎮不受約束命諸將討之藥師破順安軍營  
殺三千餘人海陵即位詔賜諸姓者皆復本姓故藥師

子安國仍姓郭氏

郭安國藥師子也累遷奉國上將軍南京副留守貞元三年南京大內火海陵使右司郎中梁球同知安武庫節度使王金按問失火狀留守馮長寧都轉運使左瀛各杖一百除名安國及留守判官大良順各杖八十削三官火起處勾當官南京兵馬都指揮使吳濬杖一百五十除名失火位押宿兵吏十三人竝斬諭之曰朕非以宮闕壯麗也自即位以來欲巡省河南汝等不知防

慎致外方姦細延燒殆盡本欲處爾等死罪特以舊人寬貸之押宿人兵法當處死疑此輩容隱姦細故皆斬也安國性輕躁本無方略海陵將伐宋以安國將家子擢拜兵部尚書改刑部尚書軍興領武捷軍都總管與武勝武平軍為前鋒海陵授諸將方略安國前奏曰趙構聞王師至其勢必逃竄臣等不以遠近追之獲而後已但置之何地海陵大喜曰卿言是也得構即置之寺觀嚴兵守之及聞世宗即位海陵謀北還更置浙西道

兵馬都統制府以完顏元宜為都統安國副之及海陵  
遇弒衆惡安國所為與李通輩皆殺之

贊曰郭藥師者遼之餘孽宋之厲階金之功臣也以一  
臣之身而為三國之禍福如是其不侔也魏公叔痊勸  
其君殺衛鞅豈無所見歟

耶律圖善系出約尼氏在遼世為顯族圖善仕至金吾  
衛大將軍裕爾詳袞遼帝奔天德圖善以所部降宗翰  
承制授尚書為西北路招討使宗翰伐宋圖善率本部

為先鋒至汾州遇宋將折家軍請濟師併力破之從攻太原隆德府從入汴克洛陽及從羅索平陝右天會七年授太子少保十年遷尚書左僕射致仕卒年九十一年正隆例贈特進部國公

烏雅呼爾哈海蘭路錫馨水人也後授愛呼水穆昆因家焉從棟摩圍平州有功及伐宋圍汴五穆昆與宋兵萬人遇於城南呼爾哈先馳擊敗之元帥府遂賞良馬一匹五年攻宗城縣敵棄城走恩州呼爾哈追殺千餘

人獲車四百輛帥府賞牛三十頭馬一匹七年討泰山  
羣盜平之毀其營柵兗州羣寇三千餘保據山險呼爾  
哈復破之賞牛二十二頭馬四匹八年攻廬州至柘臯  
鎮呼爾哈領甲士三十為前鋒執宋所遣持書與劉四  
廂錡者七人復以先鋒軍攻和州比至含山縣五里獲  
甲士二人乃知宋三將將兵且至呼爾哈伏其軍遂獲  
姚觀察帥府賞馬二匹九年定陝右呼爾哈以所部遇  
敵千人敗之生擒甲士一人盡得敵之虛實又從富埒

瑋狗地熙秦敗敵兵二千於秦州賞馬一匹宋人屯襄陽府監軍阿巴遣呼爾哈領四明安往攻之宋兵三千已渡江方營壁壘乘其未就突戰破之梁王宗弼復河南將攻陳州遣呼爾哈以甲士三千捕偵候人至蔡州西遇兵八十餘戰敗之獲南頓縣令及攻陳州夜將四更忽聞敵開門潰走呼爾哈亟領二穆昆軍追及之而明安托克索亦領軍至大敗之皇統二年遷定遠大將軍八年授臨洮少尹兼熙秦路兵馬副都總管九年改



同知京兆尹兼本路兵馬都總管天德間改同知平陽  
尹兼河東南路兵馬都總管貞元三年改同知海蘭路  
總管大定四年授呼爾哈節度使七年改歸順軍節度  
使十年移鎮顯德卒官年六十九十九年詔授其子五  
十六武功將軍世襲本路博多和河穆昆

烏雅沃哩布海蘭路禪嶺人也徙大名路天會中從其  
父達希布隸元帥右監軍麾下達蘭以事赴闕以達希  
布自隨沃哩布領其父穆昆從大軍攻滄州方夷濠隍

城中兵來拒沃哩布以本部擊却之王師下青州力戰有功獲馬百匹以獻降賊黨甚衆青州戍將德克濟布以萊州兵衆請濟於帥府沃哩布將十二穆昆兵往救之遂降其四營拔其一營得戶四千又敗賊兵五萬於恩州攻破其營降戶五萬獲牛畜萬餘將至臨清縣遇敵兵三千又敗之俘獲甚衆生擒賊首以獻帥府嘉其功以奴婢百牛三十賞之時德克濟布敗於恩州之境沃哩布復以兵四千往救破敵萬餘宋兵十萬在單父

間總管宗室伊楞古選步卒一萬騎兵四千往討之沃

哩布領其親管穆昆以從遇敵先登力戰有功大軍經

略密州沃哩布將兵二千為前鋒遇敵萬人於高密遂

敗其衆追至城下殺戮殆盡獲馬牛三千餘沃哩布復

與伯騰敗賊王義軍十餘萬於州南是夜賊兵數千來

襲營沃哩布以兵橫擊走之後從大軍攻楚陽通泰等

州天眷二年襲其父世襲明安授寧遠大將軍皇統七

年益以親管穆昆天德三年除同知歸德尹正隆初為

唐古部族節度使大定二年為保大軍節度使是歲改鎮通遠是時宋軍十萬餘入河隴據險要攻郡邑元帥左都監喀齊喀奏益兵七千遣沃哩布與彰化軍節度使宗室璋等七人偕往以備任使進階龍虎衛上將軍卒於軍中

蕭恭字敬之納琳奚王之後也父翊天輔間歸朝從攻興中遂以為興中尹師還以恭為質子宗望伐宋翊當領建興成川懿五州兵為萬戶軍帥以恭材勇使代其

父行時年二十三至中山宋兵出戰恭先以所部擊敗之經山東及渡淮襲康王皆在軍中師還帥府承制授德州防禦使奚人之屯濱隸間者皆隸焉改棣州防禦使皇統間改同知橫海軍節度使丁父憂起復為太原少尹用廉遷同知中京留守事累遷兵部侍郎授世襲穆昆坐問禁中起居狀決杖奪一官貞元二年為同知大興尹歲餘遷兵部尚書為宋國生日使以母憂去官起復為侍衛親軍馬步軍都指揮使四年遷光祿大夫

復為兵部尚書是歲經畫夏國邊界還過臨潼失所佩金牌至太原憂恚成疾時已具其事驛聞於朝海陵復命給之仍遣諭恭曰汝失信牌亦由不謹朕方俟汝欲有委使乃稱疾耶必以去日身佩信牌歸則無以為辭欲朕先知耳使至恭已疾篤稽顙受命俄頃而卒海陵方遣使與其子護衛玖格馳視乃戒府官使善護之至保州已聞訃矣海陵深悼惜之命玖格護喪以還所過州府設奠喪至都命百官致祭親臨奠賻贈甚厚并賜

廐馬一謂玖格曰爾父銜命卒於道途甚可悼惜朕乘此馬十年今賜汝父可常控至樞前既葬汝則乘之

完顏希卜蘇年十六從伐宋攻下懷仁縣功居最從睿宗經畧陝西以兵七百人入丹州諸山遇盜三千擊敗之又破賊四千生擒其將帥出隴州以兵四百敗敵數千宋兵七千來取鞏州復擊走之又以兵五千敗吳玠之衆三萬白塔口遇敵五千復敗之別降定遠等寨皇統二年授同知臨洮尹以憂去官未期以舊職起復改

孟州防禦使遷臨洮尹復以罪罷正隆三年起為京兆尹改河南尹卒年五十八

赫舍哩呼喇輝發川阿敦河人徙西北路識契丹字為帥府小吏梁王宗弼復陝西久不通問睿宗在燕京遣呼喇往候之是時宗弼自鳳翔攻和尚原使呼喇視彼中地形修道築城十二年往濱州密訪南邊事體及觀劉豫治齊狀盡得其虛實睿宗甚嘉之皇統初從宗弼渡淮及下廬和二州大破張浚韓世忠等軍遣呼喇馳



奏賞以金盃重彩五端絹五匹七年授同知景州軍州  
事以廉加忠武校尉天德初以監察御史分司行臺歷  
同知濟州防禦使事入為監察御史秩滿再任大定二  
年遷刑部員外郎與御史大夫白彥敬往西北部族市  
馬累轉泗州防禦使三遷扶餘路節度使移寧昌軍卒  
耶律恕字忠厚本名耨埒遼橫帳秦王之後也為人謹  
愿有志喜讀書通契丹大小字與耶律果巴來歸羅索  
問果巴曰與爾同來者誰可任用治軍旅事果巴對曰

釋埒可羅索與宗翰伐宋恕隸前鋒取和尚原攻仙人關特為睿宗所知再除太原真定少尹薩里罕辟署陝西叅謀委以軍務遷行臺兵部侍郎再遷尚書左司郎中海陵為平章政事謂恕曰君亦有黨乎恕正色曰窮則獨善其身達則兼善天下不以其道得之非恕之志也何朋黨之有海陵徐曰前言戲之耳久之為沁南軍節度使遷行臺工部尚書行臺罷改安國軍節度使為叅知政事以疾求解為興中尹入為太子少保正隆元

年致仕封廣平郡王薨年六十九二年例贈銀青光祿大夫

郭企忠字元弼唐汾陽王子儀之後郭氏自子儀至承勲皆節鎮北方唐李承勲入於遼子孫繼為天德軍節度使至昌金降為副使企忠幼孤事母孝謹年十三居母喪哀毀如成人服除襲父官加左散騎常侍天輔中大軍至雲中遣耶律坦招撫諸部企忠來降軍帥命同勾當天德軍節度使事徙所部居於韓州及見太祖問

知其家世禮遇優厚以白鷹賜之天會三年伐宋領西南諸部番漢軍兵為明安從破鴈門屯兵加桂州管內觀察留後鎮代州明年賊楊麻胡等聚衆數千於五臺企忠與同知州事迪里討平之遷知汾州事是時汾州初下居民多為軍士掠去城邑蕭然企忠詣帥府力請願聽其親舊贖還帥府從之未幾完實如故石州賊閻先生衆數萬至城下僚屬慮有內變請為備企忠曰吾於汾人有德保無他乃率吏民城守會援至合擊破之

六年改靜江軍節度留後遷天德軍節度使汴京步軍  
都指揮使累遷金吾衛上將軍秩滿權沁州刺史到官  
歲餘卒年六十八

烏蘇額琳善騎射襲父薩哈穆昆從蒙克攻東京及廣  
寧擊北京山賊皆有功蕭布展來攻恩州額琳以六十  
騎偵之逮夜遇敵數百騎掩擊之生獲三人知布展衆  
九萬且至故蒙克得以為備遂破布展宗望伐宋已至  
汴額琳破尉氏中牟援兵取其城久之以兵百五十人

破敵一千於滄州西明年再伐宋蒙克成開州額琳以騎四百守河復敗千餘人斬首七百餘宗弼渡淮阿里先具舟於江上聞王善兵扼其前宗弼使額琳濟師敗王善於和州北李成以兵七萬據烏江額琳帥二千人直前敗之宗弼遂渡江至江寧十五年沂州竇防禦叛額琳敗之獲竇防禦錄前後功授明安加昭武大將軍宗弼再取河南額琳以五十騎敗楊家賊五百於徐州東以功受賞不可勝計天德二年除唐州刺史移淄州

遷實壘部族節度使行至北京病卒

延扎們都隆州巴爾嘉山人也身長美鬚髯天會間從其兄揚阿在軍中方取汴京其兄戰歿遂擐甲代其兄充軍睿宗定陝右以們都為佛寧隸監軍杲親管萬戶攻饒風關至坊州杲欲與總管富勒呼會於鳳翔遣們都領六十騎先往期會及還備得地形險阨賞銀五十兩其後梁王宗弼駐軍山東遣人詣陝西特召們都至令齋廢齋及安撫百姓詔書往諭監軍宗室杲們都既

還宗弼賞以良馬銀絹事畢復遣從杲天眷初叛將定國軍節度使李世輔偽邀杲至私署以獻甲為名遂以兵劫執而去們都突出以告押軍明安完顏達蘭同率兵追及首出與戰杲由此得脫以功遷明威將軍復從杲招復陝西進至鳳翔齊國初廢諸路多反覆不一杲授們都牌劄令往撫定們都所至多張甲兵從者安之違者討之帖然無復叛者杲甚嘉之皇統初遷廣威將軍四年授同知通遠軍節度使事改知保安軍事天德



三年為丹州刺史兼知軍事正隆初為寧州刺史大定  
初宋將吳璘等以軍數十萬人據秦隴元帥府承制以  
們都為勇烈軍都總管領軍討之宋人保據德順都監  
喀齊喀遣武威軍都總管瓜爾佳扎拉會宗室璋議征討  
之策璋與們都曰須都監親至敵必退矣喀齊喀領軍四  
萬來赴遂復德順州明年秦隴平以功遷金吾衛上將  
軍授通遠軍節度使五年改慶陽尹兼本路兵馬都總  
管卒於官十九年錄功以子祿格世襲本路海蘭烏珠

明安都掄赫紳穆昆授武功將軍們都性忠厚謹懇  
安置營壁尤能慎密有敵忽來雖矢石至前泰然自若  
迺號令士卒如平時由是人益安附而功易成焉

布薩歡塔扶餘路嘉們人也身長七尺勇健有力善騎  
射年十六從其父和木索征伐初授修武校尉為宗弼  
章京天眷二年與宋岳飛相拒歡塔領六十騎深入覘  
伺至鄆陵敗宋護糧餉軍七百餘人多所俘獲皇統九  
年除慈州刺史再遷利涉軍節度使授世襲濟州和卓

海蘭明安舍哩幹實穆昆貞元初以憂去官起復舊職  
歷泰寧永定軍改咸平尹海陵殺歡塔弟樞密使呼圖  
名歡塔至南京既見深思久之為之曰汝有功舊不因  
呼圖得官以此致罪甚可憐憫遂釋之改興平軍節度  
使世宗即位以為廣寧尹幹罕反為行軍都統與海蘭  
路總管圖克坦克寧將左翼敗幹罕於長灤改臨潢尹  
賊平賜金帛改海蘭路兵馬都總管徙顯德軍慶陽尹  
致仕大定十二年上思舊功起復為利涉軍節度復以

金紫光祿大夫致仕卒年七十二歡塔歷一十七官未嘗為佐貳性沉厚有識雖未嘗學問明於聽斷所至有治聲云

鄭建充字仲實其先京兆人占籍鄜州仕宋累官知延安府事天會七年來降仍知延安府屯兵三千宋劉光烈兵八萬來攻建充相距四十餘日攻益急建充遣人會綏赫軍夾擊破之俘其裨將賀貴遷節制使統制軍馬改京兆府路兵馬都監敗宋曲端於彭原高昌宗據

延安為宋守建充擊之盡復城邑復知延安軍府事齊國建累遷博州團練使知寧州齊國廢朝廷以地賜宋為宋環慶路經畧安撫副使仍知寧州天眷復取陝西仍以為經畧安撫使知慶州從破甘谷城改平涼尹是時營建南京宮室大發河東陝西材木浮河而下經砥柱之險筏工多沉溺有司不敢以聞乃誣以逃亡錮其家建充白其事請至砥柱解筏順流散下令善游者下流接出之而錮者得釋正隆軍興括軍角造軍器百姓

往往椎牛取之或生拔取其角牛有泣下者建充白其事於朝建充性剛暴常畜獠犬十數奴僕有罪既笞已復啖犬啗之骨肉都盡雖謙遜下士於敵已上一無所屈省部文移有不應法度輒置之坐下或即毀裂由是在位者銜之軍胥李換竊用公帑自度不得免乃誣建充藏甲欲反更再鞫皆無狀方奏上攝事者素與建充有隙恐其得釋使吏持文書給建充曰朝省有命奈何建充曰惟汝所為是夜死於獄中長子愬亦死焉

烏庫哩薩哈海蘭路愛呼河人也後徙真定睿宗為右副元帥聞薩哈勇畧選充章京後從宗弼征伐補麩院都監未幾從伐宋與宋兵遇於潁州薩哈先登破之皇統元年領漢軍千戶帥府再以軍四千隸焉除同知鄭州防禦使事再遷太子少詹事大定六年改洺州防禦使上曰卿昔事睿宗積勞苦逮事朕輔佐太子宣力多矣今典名郡所以勞卿也遷永定軍節度使歷臨潢鳳翔尹陝西路統軍使東平尹節制州郡躬行儉約政先

寬簡邊庭久寧人民獲安召為簽書樞密院事卒十八年世宗追錄薩哈舊勞授其子大興河北西路愛呼河世襲明安阿里瑪河穆昆階武功將軍

伊喇溫本名阿薩爾遼橫帳人工契丹小字睿宗為左副元帥伐宋溫從大臭渡江辟江寧府都巡檢江寧太平初下宋遣謀扇構百姓應者數萬人溫擒其謀者遂不敢竊發宗弼嘉之賜銀千兩重綵百端絹二百匹宗弼每出征伐未嘗不在行間除同知河北西路轉運使



事會宗弼巡邊溫從軍不之官宗弼入朝熙宗宴羣臣  
宗弼欲有奏請已被酒失次溫掖而出宮明日熙宗謂  
宗弼曰阿薩爾事叔甚謹不可去左右由是宗弼益親  
信之嘗謂女壻赫舍哩志寧曰汝效阿薩爾之爲人也可  
以幾古人矣未幾除同知中京路都轉運使事累遷左  
諫議大夫兼脩起居注正隆伐宋以本官為濟州路行  
軍萬戶從至揚州軍還除同知宣徽院事世宗御饌不  
適口召溫嘗之奏曰味非不美也蓋南北邊事未息聖

慮有所在耳上意遂釋歷永定震武崇義節度使移臨  
海軍州治近水秋雨水潦暴至城下城頗決百姓惶駭  
不知所為溫躬督役夫繕完之雖臨不測無所避僚屬  
或止溫溫曰為政疵癘水泛溢為災守臣之罪當以此  
身為百姓謝雖死不恨移鎮武定歲旱且蝗溫割指以  
血漉酒中禱而酌之既而雨霑足有羣鴉啄蝗且盡由  
是歲熟人以為至誠之感云以老致仕卒

贊曰軍旅之事鋒鏑在前不計其死耳屬金鼓目屬旌

旗心屬號令此行列之任也自收國用兵至於大定和宋以前用命之士雖細必錄所以明功也

蕭仲恭本名珠嚕準祖托卜嘉仕遼為樞密使守司徒封蘭陵郡王父特默為中書令守司空尚主仲恭性恭謹動有禮節能被甲趨索駝遼故事宗戚子弟別為一班號孩兒班仲恭嘗為班使歷宮使本班詳表遼帝西奔天德仲恭為護衛太保兼領軍事至和羅達巴大軍奄至倉卒走仲恭母馬乏不能進謂仲恭兄弟曰汝等

盡節國家無以我為也仲恭母遼道宗季女也遼主傷之命弟仲宣留侍其母仲恭從而西時大雪寒甚遼主乏食仲恭進衣并進乾糲遼主困仲恭伏冰雪中遼主藉之以憩凡六日乃至天德始得食後與遼主俱護太宗以仲恭忠於其主特加禮待天會四年仲恭使宋且還宋人意仲恭耶律伊都皆有亡國之感而伊都為監軍有兵權可誘而用之乃以蠟丸書令仲恭致之伊都使為內應仲恭素忠信無反覆志但恐宋人留不遣遂

陽許還見宗望即以蠟丸書獻之宗望察仲恭無他薄  
罰之於是再舉伐宋執二帝以歸累遷右宣徽使改都  
點檢宗磐與宗幹爭辨於熙宗前宗磐拔刀向宗幹仲  
恭呵之乃止既而宗磐以反罪誅仲恭衛禁有備以功  
加銀青光祿大夫遷尚書右丞皇統初封蘭陵郡王授  
世襲明安進拜平章政事同監修國史封濟王詔葬遼  
豫王於廣寧仲恭請往會葬熙宗義而許之改行臺左  
丞相居無何入為尚書右相拜太傅領三省事又封曹

王天德二年封越國王除燕京留守海陵親為書以玉  
山子賜之是歲薨年六十一諡貞簡正隆例降王爵改  
儀同三司鄭國公子拱

拱本名達年鄂博初為蘭子山明安海陵為宰相徵取  
人譽薦大臣子以為達官遂以拱為禮部侍郎耶律密  
呼拱妻女弟也海陵將納為妃使拱自汴取之還過燕  
是時仲恭為燕京留守見密呼身形不類處子竊憂之  
曰上多猜嫌拱其及禍矣拱去不數日仲恭卒拱至上

京聞訃以本官起復佩信牌往燕京治葬事未行密呀  
入宮果如仲恭所相度即遣出宮夜半召拱至禁中詰  
問無狀海陵終疑之乃罷拱禮部侍郎奪其信牌拱待  
命踰年不報歸蘭子山治明安事是時蕭恭張九坐語  
禁中事得罪拱至蘭子山與客語及之有阿納爾與拱  
有隙乃誣拱言張九無罪被誅語涉怨謗海陵遣使鞫  
之戒使者曰此子狂妄宜有此語不然彼中安得知此  
事使者不復問拱但榜掠其左驗使如告語證之拱遂

見殺

仲宣本名伊里布仲恭母弟聰明好學沉厚少言五歲  
遙授郡刺史累加太子少師為本班詳袞從天祚西為  
護衛太保左右班詳袞至實納圖遼主留仲宣待母遂  
與其母皆見獲太宗嘉之且謂仲宣能知遼國故事命  
權宣徽司從睿宗伐康王師還家居者久之皇統二年  
特授鎮國上將軍歷順義永定昭義武寧四鎮節度使  
為政平易小吏不敢為姦賄賂禁絕奴婢入郡人莫識



其面朔潞百姓皆為立祠刻石頌之正隆二年卒年六十四

高松本名搏多澄州析木人年十九從軍為佛寧有力善戰宗弼聞其名召置左右從破汴京及和尚原累官咸平總管府判官世宗即位充管押東京路渤海萬戶兵部尚書克實謀反前同知延安尹李老僧曰我與萬戶高松謀之必從我矣衆曰若得此軍舉事易矣老僧往見松說松曰君有功舊人至今不得大官何也松曰

我一縣令也每念聖恩累世不能報尚敢有望乎老僧  
遂不敢言克實布呼阿蘇知事不可成遂上變共捕鄂  
倫赴有司松從征斡罕以功遷咸平少尹四遷崇義軍  
節度使卒年七十四

贊曰忠信行已豈不大哉蕭仲恭盡心故主而富貴福  
澤嚮之與宗室舊臣等矣仲恭廷叱宗磐而朝廷尊高  
松誼過李老僧而社稷安皆有古烈丈夫之風焉

海陵后圖克坦氏生太子光英元妃大氏生崇王元壽柔

妃唐古氏生縮王舒蘇鄂博才人南氏生滕王廣陽

光英本名阿里布圖克坦后所生時燕京轉運使趙襲  
慶多男故又名曰趙六養于同判太宗正方之家故崇  
德大夫沈璋妻張氏嘗為光英保母於是贈璋銀青光  
祿大夫賜宗正方錢千萬天德四年二月立光英為皇  
太子是月安置太祖畫像於武德殿畫名國初嘗從太  
祖破寧江州有功者得百七十六人竝加宣武將軍賜  
酒帛其中有呼爾罕者解其衣進光英曰臣今年百歲

矣有子十人願太子壽考多男子與小臣等海陵使光  
英受其衣海陵即以所服并佩刀賜呼爾罕答其厚意  
後以英字與鷹隼字聲相近改鷹坊為馴鷺坊國號有  
英國又有應國遂改英國為壽國應國為杞國宋亦改  
光州為蔣州光山縣為期思縣光化軍為通化軍云太  
醫院保全郎李中保和大夫薛遵義俱以醫藥侍光英  
李中超換宣武將軍太子左衛副率薛遵義丁憂起復  
宣武將軍太子右衛副率光英襁褓時養於宗正方家

後養於永寧宮及圖克坦舍音家貞元元年詔朝官京  
官五品以下奉引自通天門入居於東宮正隆元年三  
月二十七日光英生日宴百官於神龍殿賜京師大酺  
一日四年八月光英射鴉獲之海陵大喜命薦原廟賜  
光英馬一匹黃金三斤班賜從者有差正隆六年海陵  
行幸南京次安肅州光英獲二兔遣使薦於山陵居數  
日復獲麋兔從官皆稱賀賜光英名馬弓矢復遣使薦  
山陵六月海陵至南京羣臣迎謁海陵與圖克坦后光

英共載而入海陵嘗言俟太子年十八以天下付之朕  
當日遊宴於宮掖苑囿中以自娛樂光英頗警悟海陵  
謂侍臣曰上智不學而能中性未有不由學而成者太  
子宜擇碩德宿學之士使輔導之庶知古今防過失詩  
文小技何必作耶至於騎射之事亦不可不習恐其懦  
柔也及將親征后與光英挽衣號慟海陵亦泣下曰吾  
行歸矣後誦孝經一日忽謂人曰經言三千之罪莫大  
於不孝何為不孝對者曰今民家子博奕飲酒不養父

母皆不孝也光英默然良久曰此豈足為不孝耶蓋指  
言海陵弑母事及伐宋光英居守以圖們額哩頁為太  
子少師兼河南路統軍使以衛護之完顏元宜軍變海  
陵遇害都督府移文額哩頁殺光英於汴京死時年十  
二後與海陵俱葬於大房山諸王墓次額哩頁咸平路  
庫特呼河人襲其父呼圖明安除邳州刺史三遷昌武  
軍節度使歸德尹南京留守河南路統軍使太子少師  
大定二年遷元帥右都監宋人陷陳蔡額哩頁師久無

功已而兵敗於宋解職俄起為京兆尹世宗謂之曰卿為河南統軍門多私謁百姓惡之其後經畧陳蔡不惟無功且復致敗以汝舊勞故復用汝京兆地近南邊宜善理之大定三年卒

元壽天德元年封崇王三年薨

舒蘇鄂博正隆元年四月生色達東勝家保養之賜東勝錢千萬仍為起第五月己酉彌月封其母唐古氏為柔妃賜京師貧者五千人錢人錢二百二年舒蘇鄂博



生日海陵與永壽太后及皇后太子光英幸東勝家三年正月五日舒蘇鄂博薨海陵殺太醫副使謝友正醫者安宗義及其乳母杖東勝一百除名明日追封舒蘇鄂博為宿王葬大房山諫議大夫楊伯雄入直禁中因與同直者相語伯雄曰宿王之死蓋養於宫外供護雖謹不若父母膝下豈國家風俗素尚如此或以此言告海陵海陵大怒謂伯雄曰爾臣子也君父所為豈得言風俗宮禁中事豈爾當言朕或體中不佳間不視朝祇

是少得人幾拜耳而庶事皆奏決便殿縱有死刑不卽  
論決蓋使囚者得緩其死至於除授宣勅雖復稽緩有  
何利害朕每當閒暇頗閱教坊聲樂聊以自娛書云內  
作色荒外作禽荒甘酒嗜音峻宇雕墻有一於此未或  
不亡此戒人君不恤國事溺於此者耳如我雖使聲樂  
喧動天地宰相敢有濫與人官而吏敢有受賕者乎外  
間敢有竊議者乎爾諫官也有可言之事當公言之言  
而不從朕之非也而乃私議可乎伯雄對曰陛下至德

明聖固無竊議者愚臣失言罪當萬死惟陛下哀憐海陵曰本欲殺汝今祇杖汝二百既決杖至四十使近臣傳詔諭伯雄曰以爾藩邸有舊今特釋之

滕王廣陽母南氏本大臬家婢隨元妃大氏入宮海陵幸之及有娠即命為殿直正隆二年九月二十六日生廣陽十月滿月海陵分施在京貧民凡用錢千貫三年二月封南氏為才人七月封廣陽為滕正九月薨

贊曰海陵伐宋光英居守使圖們額哩頁以官師兼統

軍之任計至悉也。豈料死其手乎。苟首有言不以入子  
吾子其可得耶。海陵睨人之子不翅魚肉而獨己子之  
謀安不可得矣。

金史卷八十二